

Worschtverkoschte erschtmols im Kreis Arad - Sanktanna macht vun sich redde

Die traditionell Worschkoschtprob der „Banater Zeitung“ hat schon lang vor ihrem Stattfinne Welle im In- un Ausland gschlaa. In friehriche Zeite hats mündlich gheescht: „Hascht schon gheert...“? Un jetz, im Jahr 2014, geht alles iwer Facebook un Internet. So hat sich die Worschkoschtprob, die sogar international un weltberiehm tituliert gin is, uf dem Facebook rumgered, noch bevor eigentlich seitens der BZ-Redaktion etwas Genaues bekannt gin is. Un wie dann feschtgeleet war, de Austragungsort der Worschkoschtprob 2014 werd Sanktanna, im Kreis Arad un in der Banater Heck gelee, sin, do han sich die Sanktannaer vor Stolz nimi halle kenne un sofort e Super-Mitmache angetraa. De Richter un die Stadträt ware Feier un Flamm, es deitschi Forum hat momentan mitm Plane anfang, die Schul hat zugestimmt, de Feschtsaal zur Verfiugung zu stelle, un die Heimatortsgemeinschaft hat feschtgeleet, dass HOG-Vertreter aus Deitschland derbei sin misse. Zwaa Täch vor dem ereignisvolle „Worscht-Tach“ is dann de Winter mit aller Gewalt im Banat ingebroch, es war e Sauwetter un sogar Glatteis han die „Wettermacher“ angsaat. Doch de Worscht is em Wetter in die Quer kumm un am letschte Dunnerschdach im Jänner hat e kalti Sunn vum Himml gelacht. Un em Worschtverkoschte hat nix me im Wech gstann.

Wkp-Teilnehmer kumme zu Wort

Manfred Engelmann, Vorsitzender vum Deitsch-Rumänische Wirtschaftsclub Arad: „Aus meiner Sicht, sogar entgejer aller Erwartunge, war die dasjährich Worschkoschtprob e stark gelungeni Veranstaltung. Sowohl organisatorisch wie a vun der Teilnehmerzahl her. A die Qualität vum Worscht han ich gut gfun. Positiv iwerrascht hat mich des jungi Orchester aus Sanktanna und der `Neiworschtologe` Michael Szellner mit dere neiji Art, die Banater `Worschphilosophie` zu interpretiere!“

Grete Weidmann, Arad: „Es war alles tipp-topp un akkurat in dem Sanktanna. De ville Worscht un Kuche, alles scheen hergericht, Hausbrot un villi anri Delikatessen. Mer is jo nit zu dere Worschkoschtprob nor for esse un trinke gfahr. Mer han e scheenes un abwechslungsreiches Kulturprogramm gebot kriet. Schad nor, dass die Zuschauer nit richtig plätsche han kenne, weil se die Worschtellre in der Hand ghal han. Alli han sich stark vill Mieh gin, des Fescht so zu gsalte, dass es alli Leit gfallle soll, dass genuch zu Esse un Trinke do war, dass alle Gäscht was Besonderes gebott gin soll. Un die Sanktannaer han tatkräftich mitgholf. Drum sin ich ach froh gewenn, wie ich gheert han, dass Sanktannaer die meischte Preise gschnappt han, sie han mol wieder gewies, dass unser schwowische Brotworscht wann immer es Renne gewinne kann. Ich han mit villi Leit gered un es hat mich gfreit, dass sovill Teilnehmer vun weither un sogar aus Deitschland angereist sin. Die Idee der Zeitungsschreiwler, die Wkp in jedem Jahr wu annerscht zu organisiere, die fin ich großartich“!

Anneliese Capraru-Reitsch, Temeschwar: „Des war mol wieder was vun unsrem Schwowegschmack in dem Sanktanna. De Worscht hat alli gut gschmeckt. Es war vun allem meh wie genuch. So gute hausgebackene Kuche han ich schon lang nimi gess. Iwerhauptscht die London-Schnitte, die ware einmalich. De Bäck is die ganzi Zeit im Saal rumgang un hat in eem Kerwl Hausbrot angetraa. Ach selwer gemachte Hauswein is angebot wore. Die Schulkiner han deitsch un rumänisch gsung un getanzt, sie ware in der Sanktannaer schwowischi un rumänisch Tracht angezoo. E Jugendorchester hat sogar die Hymnen gspillt. Un die ville Rede, die gschwung gin sin! Alles hat halt e End. Doch de Worscht hat zwaa Enner. Un drum gfreiye mer uns schon jetz uf die näkshti Worschkoschtprob. Un sovill Leit, die kumm ware. Aus alli Richtunge sin se gstreemt. Sicher war a bissl Neigier derbei. Doch noh sovill Jahr wees jeder Zeitungsleser un Zeitungsfreund, dass die Wkp etwas ganz Besonderes is. Sie halt uns Schwoweleit zamm, git uns Gelegenheit Perseenlicheite kennezulerne un is e Beweis derfor, dass mer uns nit losse!“